



Broj: 02-04-2145/25-AP-3
Datum: 24.10.2025. godine

GRADSKO VIJEĆE ZAVIDOVIĆI
n/r PREDSEDavajućoj Gradskog Vijeća
Hadžić dr. Amira, spec. radiolog

PREDMET: Odgovori na vijećnička pitanja sa 10. sjednice Gradskog
vijeća Zavidovići održane 30.09.2025. godine, dostavljaju se

Povodom vijećničkih pitanja postavljenih na 10. sjednici Gradskog vijeća Zavidovići
održanoj 30.09.2025. godine, dostavljamo odgovore na iste kako slijedi:

1. VIJEĆNIČKO PITANJE VIJEĆNIKA ASIMA DŽINDE

Vijećnik Asim Džindo: Na osnovu članova 8. i 87. Poslovnika o radu Gradskog vijeća
Zavidovići, kao vijećnik Gradskog vijeća Zavidovići postavljam sljedeće vijećničko pitanje:

Tražim od nadležnih gradskih službi da nam dostave informaciju ko je nadležan za
održavanje javnog gradskog WC-a ispod mosta na području našeg grada. Konkretno, da li se
održavanje vodi pod nadležnošću JKP "Radnik" ili druge gradske službe, te iz kog razloga je
objekat u proteklom periodu prepušten sam sebi, iako su uložena značajna sredstva za njegovo
renoviranje i adaptaciju.

Od nadležnih zahtijevam jasne odgovore u pisanoj formi, zajedno sa informacijom o
planovima daljnjeg održavanja i funkcionisanja ovog objekta.

Vijećničko pitanje upućuje se nadležnim gradskim službama.

Odgovor na vijećničko pitanje (Odgovor je sačinjen na osnovu akta Službe za upravu
poljoprivrede, vodoprivrede i komunalnih poslova, broj: 08-45-22/25-AP-130 od 22.10.2025.
godine): Gradsko vijeće Zavidovići je na 26. sjednici, održanoj dana 27.06.2024. godine,
donijelo Odluku broj: 01-19-1353/24-AP-5 o davanju saglasnosti na upravljanje javnim
gradskim WC-om, na neodređeno vrijeme preduzeću JKP „Radnik“ d.o.o. Zavidovići.
Održavanje i funkcionisanje objekta će biti realizovano od strane JKP „Radnik“ d.o.o.
Zavidovići po zaključivanju ugovora o davanju na upravljanje nepokretne stvari.

Po prikupljanju neophodnih podataka i analiza o potrebnim finansijskim, materijalno-
tehničkim i drugim resursima za održavanje javnog WC-a, pristupit će se potpisivanju ugovora
u skladu sa Odlukom Gradskog vijeća.

2. VIJEĆNIČKO PITANJE VIJEĆNIKA ELVEDINA HUSKIĆA

Vijećnik Elvedin Huskić: Na osnovu članova 8. i 87. Poslovnika o radu Gradskog vijeća
Zavidovići, kao vijećnik

Gradskog vijeća Zavidovići postavljam sljedeće vijećničko pitanje: Kada i kako se planira okončati decenijska saga oko izgradnje mosta na rijeci Krivaja u Mjesnoj zajednici „Ribnica“ uništenog u poplavama iz 2014 godine?

OBRAZLOŽENJE

U mjesnoj zajednici Ribnica na rijeci Krivaja sve do poplava iz 2014 godine, postojao je viseći most koji je povezivao naseljeno mjesto Gornju Gosovicu sa naseljem Predražići i regionalnom cestom Zavidovići-Olovo.

Most je bio izgrađen isključivo vlastitim sredstvima mještana i osim prijelaza za pješake, mostom je moglo da se saobraća i sa putničkim motornim vozilima. Majskom poplavom od prije 11 godina most je u potpunosti uništen te su od tada i svi oni koji su ga svakodnevno koristili, prinuđeni da sve ove godine kilometrima i lošom makadamskom cestom pješake i voze se do Ribnice i regionalne ceste Zavidovići-Olovo. Nakon što u prvih 7 godina poslije poplava, nije bilo sluha ni od kog nivoa vlasti za njegovu ponovnu izgradnju, Savjet mjesne zajednice je prije 4 godine obezbijedio donatora iz prijateljskih Ujedinjenih Arapskih Emirata koji su obezbijedili glavninu sredstava za ponovnu izgradnju mosta, a Gradska uprava sa tadašnjim gradonačelnikom na čelu, se obavezala da će sa svoje strane obezbijediti ostali manji dio neophodnih sredstva za potpuno okončanje radova.

U tom periodu se ponovno uključuju i sami mještani i sa svoje strane obezbjeđuju 10.000KM koje uplaćuju tadašnjem izvođaču radova a sve u cilju što bržeg okončanja svih radova i puštanja mosta u upotrebu.

Nakon što je izvođač radova (po njegovoj verziji) izvršio radove u visini sredstava koja su mu uplaćena a radi se isključivo o sredstvima donatora i mještana a koja nisu bila dovoljna za završetak svih radova te posto Gradska uprava na čelu sa tadašnjim gradonačelnikom nije sa svoje strane uplatila ni jednu jedinu marku a koju je obećala i obavezala se potpisanim ugovorom sa donatorom, došlo je do prekida radova i most još uvijek i nakon više od 11 godina stoji nezavršen.

Odgovor na vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-9-461/25 od 21.10.2025. godine): Grad Zavidovići nije bio aktivni sudionik građenja mosta, već su sve aktivnosti vođene na relaciji donator International charity organization, Ujedinjeni arapski emirati, izvođač radova BN Transport d.o.o. i MZ „Ribnica“ ili grupa građana iz MZ „Ribnica“. Također, Grad Zavidovići nije obaviještavan o početku radova, samom izvođenju kao i o završetku radova. Po saznanju o problemima prilikom realizacije ovog projekta, dana 11.06.2024. godine, ispred Gradske službe za upravu privrede, lokalni razvoj, infrastrukturu i međunarodnu saradnju Zavidovići, na teren su izašla službena lica, a u svrhu pregleda mosta u mjestu Kršić, MZ „Ribnica“.

Dolaskom na teren zatečeno je sljedeće stanje:

1. Noseća konstrukcija mosta urađena je od AB platna, koje je postavljeno na postojeće stijene koje su se nalazile u rijeci. Vidljivo je da AB platna nisu urađena po pravilima struke, odnosno dijelovi platna nisu cijelom površinom oslonjeni na stijene / tlo, što daje utisak nestabilnosti i nestručnog izvođenja istog. Također, primjetno je da marka ugrađenog betona loša i da nabijenost betona u platnima nije urađena propisno.
2. Preko AB platna postavljeni su različiti uzdužni čelični nosači, ali pošto nemamo uvid u projektnu dokumentaciju, ne znamo da li postavljeni nosači odgovaraju statički predviđenim nosačima.
3. Prilazne ploče na mostu nisu završene, nasut je jedan dio tampona od riječnog kamena različite granulacije.

4. Završni sloj mosta je urađen od čeličnih limenih ploča debljine 4 mm, koje su jako loše postavljene i varene za čelične nostace. Primjetno je ispupčenje na pločama i da kompletan završni sloj na mostu, zajedno sa ogradom, nije stabilan, veze, odnosno varovi nisu urađeni prema pravilima struke i ne odaju utisak stabilnosti konstrukcije. Prilikom kretanja preko mosta, cijela završna konstrukcija, zajedno sa ogradom se pomjerila, odnosno „vibrirala”.

Obzirom da most nije urađen prema pravilima struke i da na osnovu vizuelnog pregleda, most djeluje nestabilno i nesigurno, preporuka je da se na mostu onemogući bilo kakvo kretanje, te da se izradi Projekat izvedenog stanja, koji će biti jasan i dokumentovan pokazatelj stanja mosta i na osnovu kojeg će se moći okončati radovi.

Istog dana, 11.06.2024. godine, Inspektor za ceste je donio Rješenje, broj: 03-23-2389/24 o zabrani saobraćaja preko mosta.

Izradom Projekta izvedenog stanja dobit će se jasne smjernice budućeg djelovanja.

3. VIJEĆNIČKA PITANJA VIJEĆNICE AZRE SINANOVIĆ

1. Vijećnica Azra Sinanović: Vijećničko pitanje (1)

Prije dvije godine Gradska uprava Zavidovići započela je postupak sa IDDEEA-om u vezi izdavanja uvjerenja o prebivalištu a koje bi radila Služba za društvene djelatnosti, pitanja boraca i opću upravu službenim putem čime bi građanima bilo olakšano ostvarivanje njihovih prava.

Moje pitanje je: Zašto do sada nije potpisan ugovor o tome, kao što su to učinile susjedne općine, uzimajući za činjenicu da je prethodna gradska vlast proceduru dovela sve do potpisivanja ugovora?

Odgovor na vijećničko pitanje (Odgovor je sačinjen na osnovu akta Stručne službe gradonačelnika, broj: 02/1-45-7/25-AP-74 od 20.10.2025. godine): Grad Zavidovići je početkom godine pokrenuo postupak za pristup evidenciji jedinstvenog matičnog broja i prebivališta i boravišta državljana Bosne i Hercegovine. Nakon provedene procedure Grad Zavidovići je izvršio nabavku potrebne opreme, Firewall-a i dodatnog internet paketa sa statičkom IP adresom, za potrebe uspostavljanja VPN konekcije sa Agencijom za identifikacione dokumente, evidenciju i razmjenu podatka Bosne i Hercegovine.

Agencija za identifikacione dokumente, evidenciju i razmjenu podataka Bosne i Hercegovine i Grad Zavidovići 05.03.2025. godine potpisali su Sporazum o stalnom pristupu podacima prijemnog organa putem web servisa, broj: UP-15-06/3-07-8-940-3/2025 od 05.03.2025. godine.

Trenutno se može izvršiti pregled traženih podatka preko web platforme Agencije za identifikacione dokumente, evidenciju i razmjenu podataka Bosne i Hercegovine, ali se ne može izvršiti printanje podatka radi čuvanja u spisu.

Stručna služba gradonačelnika u narednom periodu planira pokrenuti postupak javne nabavke kupovinu potrebne aplikacije.

Na 7. sjednici Gradskog vijeća održanoj 29.05.2025. godine vijećnik Igor Šimšić je podnio inicijativu za donošenje Odluke za izmjene i usklađivanja internih pravilnika i pristupanje postupku prijave i implementacije elektronskog izdavanja i razmjene CIPS potvrda, koja je bila na dnevnom redu 9. sjednice Gradskog vijeća. Vijećnik Igor Šimšić je povukao predmetnu inicijativu zbog već poduzetih aktivnosti na implementaciji realizacije za pristup evidenciji jedinstvenog matičnog broja i prebivališta i boravišta državljana Bosne i Hercegovine.

U prilogu akta dostavljamo Vam Sporazum o stalnom pristupu podacima prijemnog organa putem web servisa, broj: UP-15-06/3-07-8-940-3/2025 od 05.03.2025. godine.

2. Vijećnica Azra Sinanović: Vijećničko pitanje (2)

U pripremi obilježavanja manifestacije Ljeto u gradu asfaltiran je plato - prostor ispred Kulturno sportskog centra Zavidovići.

Tražim odgovor: Koje privredno društvo je izvođač pomenutih radova, po kojoj cijeni i ko je ugovorio navedene radove? Da li je provedena tenderska procedura i koliko je firmi učestovalo na tenderu. Molim da mi se dostave informacije o ponuđenim cijenama svakog pojedinačnog ponuđača.

Također zahtijevam da mi se dostavi informacija ko je bio nadzorni organ kao i izvještaj nadzora o izvedenim radovima.

Odgovor na vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-9-461/25 od 21.10.2025. godine):

1. Izvođač radova na asfatiranju plato - prostora ispred Kulturno-sportskog centra Zavidovići je JKP „Radnik“ d.o.o. Zavidovići.
2. Cijena radova bila je 29.470,79 KM (dvadesetdevethiljadačetiristotinesedamdeset i 79/100 konvertibilnih maraka). PDV je uračunat u cijenu.
3. Javna nabavka je vršena na osnovu Odluke koja se izuzima iz postupka primjene Zakona o javnim nabavkama u skladu sa članom 10c. stav (1) tačka a).
4. Realizaciju navedenog ugovora pratio je Viši referent za poslove građenja, investicija, infrastrukturu, saobraćaj i ekologiju, a obzirom na karakter i složenost radova nije angažovan eksterni nadzor u skladu sa Zakonom o prostornom planiranju i građenju. Izvještaj o izvedenim radovima urađen je na osnovu stvarnih izvedenih radova.

4. VIJEĆNIČKO PITANJE VIJEĆNIKA HARISA HODŽIĆA

Vijećnik Haris Hodžić: Na osnovu članova 8. i 87. Poslovnika o radu Gradskog vijeća Zavidovići, kao vijećnik Gradskog vijeća Zavidovići postavljam sljedeće vijećničko pitanje: Ko je dao nalog za rekonstrukciju ulice Alije Izetbegovića?

Direktno pitanje:

Ko je u nadležnoj gradskoj službi dozvolio podizanje i frezanje dobro stojeće asfaltne podloge u ulici Alije Izetbegovića od raskrsnice na semaforima pa do kraja ulice?

Obrazloženje:

Veliki broj građana traži informaciju zašto nadležna gradska služba i gradonačelnica izvodi radove na jako dobrim dijelovima ulica, odnosno podiže asfaltnu podlogu koja je u jako dobrom stanju, na uštrb gradskih ulica koje zahtijevaju hitnu sanaciju i zamjenu asfaltne podloge.

Također, potrebno dostaviti informaciju zašto nadležna gradska služba i gradonačelnica rade sanaciju gradskih ulica mimo odobrenog plana rekonstrukcije kojeg je odobrilo Gradsko vijeće Zavidovići i u skladu sa kojim planom, ovlastima i odobrenjem poduzimaju radnje na sanaciji ulice Alije Izetbegovića?

Uz ovo pitanje dostaviti i stav nadležne službe o nužnosti, opravdanosti i potrebama sanacije ove ulice kao i informaciju kada je zadnji put rađena sanacija ovog dijela ulice.

Od nadležnih zahtijevam jasne odgovore u pisanoj formi.

Vijećničko pitanje upućuje se nadležnoj gradskoj službi.

Odgovor na vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-9-461/25 od 21.10.2025. godine):

1. Projekat i kontekst realizacije

Rekonstrukcija dijela ulice Alije Izetbegovića izvodi se u okviru međunarodnog projekta „Zeleni urbani centar: Jačanje klimatske otpornosti kroz održivi redizajn gradskog jezgra“ (*Green Urban Center: Strengthening Climate Resilience through Sustainable Redesign of the City Core*), koji se realizuje uz podršku Deutsche Gesellschaft für Internationale Zusammenarbeit (GIZ) GmbH kroz program Green Agenda – WB Adapt.

Grad Zavidovići je, na osnovu potpisanog Memoranduma o razumijevanju (MoU) sa GIZ-om, dobio grant sredstva u iznosu od 85.000 EUR, namijenjena upravo za implementaciju mjera iz projekta koji se odnosi na urbanu otpornost, zelenu infrastrukturu i poboljšanje mikroklimatskih uslova u centralnom dijelu grada.

Pored toga, Grad Zavidovići je u 2025. godini dobio sredstva Federalnog ministarstva prometa i komunikacija u ukupnom iznosu od 198.483,60 KM namijenjena za sanaciju ulice Alije Izetbegovića, pri čemu će dio tih sredstava biti iskorišten za sufinansiranje realizacije projekta „Zeleni urbani centar“, čime Grad dodatno osigurava finansijsku održivost projekta i učešće lokalne zajednice.

2. Zašto se rekonstruiše dio ulice Alije Izetbegovića

Radovi u ulici Alije Izetbegovića nisu klasična sanacija kolovoza, već predstavljaju prvu fazu implementacije međunarodnog projekta kojim se planira:

- zamjena postojećeg asfalta, te trotoara koji će biti permeabilni tj. omogućavati infiltraciju oborinskih voda i sprečavaju zadržavanje vode na površini;
- uređenje trotoara i sadnja drvoreda autohtonih vrsta drveća radi smanjenja toplotnih ostrva i poboljšanja mikroklimе;
- formiranje pješačke i biciklističke zone kao dijela šireg koncepta „zelenog urbanog jezgra“;
- postavljanje mikroklimatskih senzora, solarne rasvjete i urbane opreme;
- uređenje budućeg centralnog gradskog trga i javnih površina kao zajedničkog prostora za građane.

Asfaltna površina se, dakle, ne uklanja zbog dotrajalosti, već zbog tehničke potrebe za ugradnju nove podloge koja bi bila u skladu sa permeabilnim trotoarima i pratećom infrastrukturom. Ovaj pristup je u potpunosti usklađen s principima zelene i održive urbane mobilnosti koje promoviše GIZ kroz WB Adapt program.

3. Usklađenost sa planovima i ovlaštenjima

Projekat „Zeleni urbani centar“ je u potpunosti usklađen sa Planom kapitalnih ulaganja Grada Zavidovići, koji predviđa izuzetke od redoslijeda realizacije kada Grad postane korisnik donatorskih sredstava i kada se projektne aktivnosti finansiraju iz vanjskih izvora, isto važi i za

Plan i program održavanja i zaštite i program rekonstrukcije, izgradnje i obnove lokalnih cesta i gradskih ulica Grada Zavidovići za 2025. godinu.

Ova odredba omogućava da se projekti koji imaju donatorsku podršku — poput ovog GIZ projekta — realizuju i izvan redovne liste prioriteta, kako bi Grad iskoristio raspoloživa sredstva i unaprijedio javnu infrastrukturu bez dodatnog finansijskog opterećenja budžeta.

4. Odluka, stručni nadzor i međunarodna ekspertiza

Odluku o uključivanju u projekat i izvođenju radova donijela je Gradonačelnica Grada Zavidovići, na prijedlog nadležne službe (Služba za upravu privrede, lokalni razvoj, infrastrukturu i međunarodnu saradnju), uz prethodno izrađen i dostavljen projektni prijedlog i plan realizacije, koji je odobren od strane GIZ-a i za koji je potpisan Memorandum o razumijevanju (MoU) između Grada i GIZ-a.

Posebno ističemo da će GIZ angažovati međunarodnog eksperta za prostorno i saobraćajno planiranje, gospodina Aljaža Plevnika iz Slovenije, rukovodioca Transformative Transport Planning Research Group pri Urbanističkom institutu Republike Slovenije.

Gospodin Plevnik će pružiti stručnu podršku Gradu Zavidovići u izradi integrisanog koncepta urbanog i saobraćajnog planiranja za centralno područje grada – ulicu i trg Alije Izetbegovića – s posebnim fokusom na klimatsku otpornost, zelenu infrastrukturu i održivu mobilnost.

Njegov angažman će obuhvatiti:

- analizu postojećeg stanja i identifikaciju izazova i potencijala,
- izradu projektnog zadatka (Project Task) za glavni projekat na osnovu već odabranog idejnog rješenja,
- preporuke za uključivanje zajednice i razvoj „zelenih ulica“ s ciljem ublažavanja efekta urbanih toplinskih ostrva.

Sve troškove angažmana eksperta snosi GIZ, što dodatno potvrđuje međunarodni značaj i stručnu podršku ovom projektu.

5. Opravdanost i koristi projekta

Očekivani rezultati projekta uključuju:

- povećanje površina pod zelenilom u centralnom gradskom području,
- poboljšanje kvaliteta zraka i mikroklimatskih uslova,
- smanjenje rizika od poplava i pregrijavanja površina,
- unapređenje javnog prostora i kvaliteta života građana,
- razvoj urbane otpornosti i promociju održive mobilnosti.

Ovo je pilot projekat kojim Grad Zavidovići postaje prvi primjer u Zeničko-dobojskom kantonu (a zasigurno i šire) implementacije principa „zelene urbane otpornosti“ prema modelu koji se trenutno razvija u drugim gradovima Zapadnog Balkana (Zagreb, Podgorica, Tirana, Skoplje).

6. Prethodne sanacije

Dio ulice Alije Izetbegovića koji je obuhvaćen ovim radovima nije bio predmet rekonstrukcije u posljednjih više od deset godina, osim manjih sanacija udarnih rupa, te je stoga tehnički opravdano izvršiti zamjenu slojeva koji su imali brojna ulegnuća u kojima se zadržavala voda kao i mrežaste pukotine asfaltne površine.

Zaključak

Radovi u ulici Alije Izetbegovića dio su međunarodno podržanog projekta „Zeleni urbani centar“, u okviru kojeg Grad Zavidovići, uz finansijsku i tehničku podršku GIZ-a i sufinansiranje iz sredstava Federalnog ministarstva prometa i komunikacija, provodi aktivnosti modernizacije javnog prostora, povećanja otpornosti na klimatske promjene i unapređenja kvaliteta života građana.

Realizacija ovog projekta ne predstavlja samostalnu ili vanplansku odluku, već dio međunarodno finansirane razvojne inicijative koja se provodi transparentno, uz stručni nadzor međunarodnog eksperta, i u potpunosti u skladu sa zakonskim propisima i odlukama Gradskog vijeća.

5. VIJEĆNIČKO PITANJE VIJEĆNIKA ZAHIDA AVDIČEVIĆA

Vijećnik Zahid Avdičević: Pohvalio bih organizaciju neslužbenog dijela Svečane sjednice Gradskog vijeća Zavidovići. Međutim ne mogu da ne “...” čekao sam baš zadnji da se javim da ne pitam neke stvari, da sačekam da vidim da li će neko drugi od vijećnika postaviti kakvo pitanje. Po Poslovniku o radu Gradsko vijeće ima Redovne, Svečane, Tematske sjednice kojom predsjedavajući Predsjedavajući Gradskog vijeća, u njegovom odsustvu, njegov zamjenik ili koga Vijeće odredi. Imali smo tamo jedan čin gdje samom sjednicom nije predsjedavala predsjedavajuća, i da vam budem iskren ovo je moja trinaesta svečana sjednica, smješteni smo u četvrti red, vjerujte mi da sam kao vijećnik bio iznenađen postupkom. Pitam ko je organizovao sjednicu Gradskog vijeća, gdje su vijećnici bili smješteni u četvrti red, eventualno peti. Da li su time povrijeđeni članovi Poslovnika, član 27. i član 57. Naglašavam dakle, ipak je to bila Svečana sjednica Gradskog vijeća, a ne ostalih institucija.

Odgovor na vijećničko pitanje (Odgovor je sačinjen na osnovu akta Stručne službe Gradskog vijeća, broj: 01-04-2096/25-AP-2 od 24.10.2025. godine): Na osnovu člana 13. stav (3) i člana 18. Privremene Statutarne Odluke Grada Zavidovići („Službeni glasnik Općine Zavidovići“, broj: 4/2022), člana 58. i 60. stav (1), a u vezi sa članom 31. stav (1), alineja 2) Poslovnika o radu Gradskog vijeća Zavidovići – novi prečišćeni tekst („Službeni glasnik Grada Zavidovići“, broj: 7/22 i 1/23), Kolegij Gradskog vijeća Zavidovići, na svojoj 9. sjednici održanoj dana 04.09.2025. godine utvrdio je Protokol i termin za održavanje Svečane sjednice Gradskog vijeća Zavidovići u povodu 15. septembra - Dana Grada Zavidovići.

Na 9. sjednici Kolegija Gradskog vijeća prilikom utvrđivanja Protokola Svečane sjednice, naglašeno je da će predsjedavajuća otvoriti Svečanu sjednicu sa uvodnim izlaganjem, a u daljem toku svečane sjednice - kulturno-zabavni program voditi moderator kako bi se naglasio svečani karakter sjednice, čime nije povrijeđen član 27. i član 57. Poslovnika o radu Gradskog vijeća Zavidovići – novi prečišćeni tekst.

Svečana sjednice u povodu 15. septembra - Dana Grada Zavidovići, održana je 15.09.2025. godine u Javnoj ustanovi „Kulturno-sportski centar“ Zavidovići – Kino sala u 15.00 sati.

U pripremi obilježavanja 15. septembra - Dana Grada Zavidovići i održavanja Svečane sjednice Gradskog vijeća u povodu 15. septembra - Dana Grada Zavidovići, nadležne Službe su otpremile 170 pozivnica za goste, te u skladu sa Programom obilježavanja - 15. septembra -

Dana Grada Zavidovići, tehničkim uslovima prostora u kojem se održavala Svečana sjednica Gradskog vijeća u povodu 15. septembra - Dana Grada Zavidovići, naznačena su i mjesta sjedenja Vijećnika i pozvanih gostiju.

Za pripremu Svečane sjednice Gradskog vijeća u povodu 15. septembra - Dana Grada Zavidovići u administrativno-tehničkom smislu bila je zadužena Stručna služba Gradskog vijeća i JU „Kulturno-sportski centar Zavidovići“.

S poštovanjem

Dostavljeno:

GRADONAČELNICA

1. Naslovu,
2. U spis.

mr. iur. Erna Merdić Smailhodžić

Akt pripremio: _____
(Nermin Čahtarević)